



Amaran!

Pihak Jabatan Agama Islam Perak tidak bertanggungjawab terhadap sebarang penambahan ayat selain daripada kandungan khutbah yang dikeluarkan.

"MENGHAYATI PERISTIWA NUZUL AL-QURAN"

29 Mac 2024 / 18 Ramadan 1445

الْحَمْدُ لِلَّهِ¹ الَّذِي أَنْعَمَ عَلَيْنَا شَهْرَ رَمَضَانَ بِنِعْمَةِ الصِّيَامِ، وَفَضَّلَ أَيَّامَهُ عَلَى سَائِرِ الْأَيَّامِ،
وَضَاعَفَ فِيهِ الْأَجُورَ وَالْإِنْعَامَ، وَشَرَعَ فِي نَهَارِهِ الصِّيَامَ وَفِي لَيْلِهِ الْقِيَامَ. أَشْهَدُ أَنْ لَا إِلَهَ
إِلَّا اللَّهُ وَحْدَهُ لَا شَرِيكَ لَهُ الْمَلِكُ الْعَلَامُ، وَأَشْهَدُ أَنَّ مُحَمَّدًا عَبْدُهُ وَرَسُولُهُ رَسُولُ
السَّلَامِ. اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ² وَعَلَى آلِهِ وَأَصْحَابِهِ وَالتَّابِعِينَ لَهُمْ يَا حَسَنَ إِلَى
يَوْمِ الدِّينِ. أَمَّا بَعْدُ، فَيَا عِبَادَ اللَّهِ! اتَّقُوا اللَّهَ³ أَوْصِيكُمْ وَإِيَّايَ بِتَقْوَى اللَّهِ فَقَدْ فَازَ الْمُتَّقُونَ.

Jemaah yang dimuliakan,

Marilah kita tingkatkan ketakwaan ke hadrat Allah SWT, dengan melaksanakan segala perintah dan menjauhi semua larangan Nya, mengikhhlaskan setiap amalan, semoga kita dilimpahi rahmat Allah ketika di dunia, demikian juga ketika di akhirat. Bersempena sambutan Nuzul al-Quran, mimbar akan membicarakan khutbah bertajuk: "MENGHAYATI PERISTIWA NUZUL AL-QURAN"

Firman Allah SWT, melalui ayat 185 surah al-Baqarah:

شَهْرُ رَمَضَانَ الَّذِي أُنزِلَ فِيهِ الْقُرْآنُ هُدًى لِّلنَّاسِ وَبَيِّنَاتٍ مِّنَ الْهُدَىٰ وَالْفُرْقَانِ

Bermaksud: Bulan Ramadan yang padanya diturunkan al-Quran, sebagai petunjuk bagi manusia dan penjelasan mengenai petunjuk itu dan (menjelaskan) perbezaan (antara yang benar dan yang salah).

Ayat tersebut merujuk kepada wahyu pertama yang diterima oleh Rasulullah SAW, bermula ayat 1 hingga 5 surah al-'Alaq, yang berlaku pada bulan Ramadan, ketika Baginda SAW sedang beruzlah di gua Hira'. Berdasarkan ayat pertama surah al-Qadr, Ibnu Abbas menjelaskan, penurunan al-Quran secara keseluruhan dari *Lauh Mahfuz* ke *Baitul Izzah* di langit dunia, juga berlaku pada bulan Ramadan, dan kemudiannya

¹ Memuji Allah

² Selawat ke atas Nabi Muhammad SAW

³ Pesan Taqwa



diturunkan secara beransur-ansur kepada Rasulullah SAW, mengambil masa 22 tahun, 2 bulan, 22 hari, sebagaimana firman Allah SWT melalui ayat 106 surah al-Isra':

﴿وَقُرْءَانًا فَرَقْنَاهُ لِتَقْرَأَهُ عَلَى النَّاسِ عَلَى مُكْثٍ وَنَزَّلْنَاهُ تَنْزِيلًا ﴿١٠٦﴾﴾

Bermaksud: Dan al-Quran itu telah Kami turunkan sedikit demi sedikit agar kamu (wahai Muhammad) membacaknya perlahan-lahan kepada manusia dan Kami menurunkannya dengan beransur-ansur.

Ayat-ayat al-Quran diturunkan secara beransur-ansur bertujuan agar boleh diajarkan kepada manusia secara teliti, tanpa bergopoh gapah, agar maksud yang terkandung dalam ayat-ayat yang diturunkan dapat difahami, dijadikan pengajaran, lalu disusuli dengan amalan. Ayat-ayat al-Quran diturunkan secara beransur-ansur dengan tujuan untuk merungkaikan dan menjawab setiap permasalahan yang timbul melalui pelbagai peristiwa yang berlaku, hatta mengabsahkan al-Quran itu, benar-benar kalamullah, dan bukan reka cipta Rasulullah SAW. Al-Quran dijamin keasliannya dan kesahihannya seawal penurunannya sehingga ke hari kiamat. Firman Allah SWT:

﴿إِنَّا نَحْنُ نَزَّلْنَا الذِّكْرَ وَإِنَّا لَهُ لَحَافِظُونَ ﴿١﴾﴾

Bermaksud: Sesungguhnya Kamilah yang menurunkan al-Quran, dan sesungguhnya Kamilah yang memeliharanya. (Surah al-Hijr ayat 9)

Mimbar menarik perhatian ummah kepada beberapa penghayatan penting daripada peristiwa penurunan al-Quran:

Pertama: Jibrail AS merupakan perantara penurunan al-Quran kepada Rasulullah SAW. Setelah menghafalnya Rasulullah akan menyampai dan mengajarkannya kepada para sahabat. Bacaan Rasulullah SAW akan disemak oleh Jibrail AS pada setiap bulan Ramadan, demikian juga Baginda akan menyemak bacaan para sahabat.

Kedua: Pengumpulan al-Quran serta bagaimana al-Quran *dimushafkan* atau dibukukan telah melalui satu disiplin yang amat tersusun, bermula pada zaman Khalifah Abu Bakar al-Siddiq RA. Sayidina Umar al-Khattab RA, melalui ijtihadnya telah meyakinkan Sayidina Abu Bakar al-Siddiq untuk memulakan ikhtiar pengumpulan al-Quran yang dibantu oleh kepakaran Sayidina Zaid Bin Thabit RA. Dalam proses pengumpulan al-Quran, dua orang sahabat tersebut telah meletakkan syarat dan disiplin yang ketat lagi rapi dengan menyemak semua hafalan dan catatan penulisan al-Quran dari para sahabat,



sebelum diterima dan disahkan bertepatan menurut yang disampaikan oleh Rasulullah SAW. Al-Quran yang *dimushafkan* iaitu dibukukan pada zaman pemerintahan Sayidina Abu Bakar, dan disambung dalam bentuk *mushaf* atau kitab yang lebih seragam pada zaman pemerintahan Sayidina Uthman RA.

Ketiga: Penurunan al-Quran ialah titik permulaan kepada perubahan peradaban manusia, merubah kegelapan jahiliah kepada sinar cahaya Islam. Manusia beralih daripada menyembah berhala kepada menyembah Allah Yang Maha Esa. Kebatilan dan kezaliman berubah kepada kebenaran dan keadilan. Negara Islam Madinah diasaskan atas nilai persaudaraan dan perpaduan umat sejagat. Nilai-nilai insani dipelihara. Sebaik baik manusia ialah yang paling bertakwa dalam kalangan mereka. Tiada lagi penindasan dan kezaliman. Yang kaya membantu yang miskin; yang kuat membantu yang lemah. Manusia hidup dalam rukun dan damai selagi al-Quran menjadi rujukan, panduan dan pedoman kehidupan.

Keempat: Al-Quran ialah mukjizat agung kurniaan Illahi. Al-Quran terdiri daripada 30 juzuk, 114 surah, 6236 ayat (4,780 ayat diturunkan di Mekah; 1,456 ayat diturunkan di Madinah), 77,437 perkataan dan 323,671 huruf. Terandung nilai mukjizat yang menyeluruh bermula dengan kemukjizatan bahasa al-Quran; keindahan dan ketajaman bahasanya di luar kemampuan manusia untuk menghasilkannya. Diikuti dengan kemukjizatan syariat al-Quran; syariat solat, puasa, haji dan ibadah-ibadah lain, mengatasi keupayaan akal pemikiran manusia. Kemukjizatan kejiwaan merujuk kepada kesan kepada makhluk apabila ayat-ayat al-Quran diperdengarkan. Begitu juga kemukjizatan saintifik yang telah terbukti kebenaran pada era kemajuan sains dan teknologi. Kajian kemukjizatan al-Quran telah menjadi asbab ramai dalam kalangan pengkaji telah menerima hidayah Allah SWT.

Jemaah yang dirahmati Allah SWT

Sempena sambutan nuzul al-Quran mimbar mengajak ummah menginsafi perkara-perkara berikut:

Pertama: Al-Quran adalah wahyu yang mengandungi panduan kehidupan meliputi semua aspek kehidupan yang wajib dipelajari, difahami dan diamalkan. Al-Quran bertujuan membimbing manusia mengenali dan menyembah Allah Yang Maha Esa; tempat pergantungan sekalian makhluk. Sebarang usaha bersifat menyanggah kebesaran dan kemuliaan Allah SWT merupakan perbuatan tercela yang wajib dihalang.



Kedua: Ibu bapa bertanggungjawab memastikan anak-anak boleh membaca al-Quran. Kaedah pengajaran al-Quran jangan dilakukan secara terburu-buru, untuk anak-anak mahu cepat dikhatamkan sebaik selesai membaca 30 juzuk. Di sebaliknya, anak-anak hendaklah dididik dan diasuh untuk turut memahami maksud dan menghayati kandungan al-Quran, agar kandungan al-Quran dijadikan panduan dan pedoman dalam kehidupan harian.

Ketiga: Kesempurnaan bacaan al-Quran boleh dilakukan melalui disiplin ilmu tajwid mengenali hukum bacaan, menyempurnakan sifat dan sebutan huruf. Bacaan al-Quran yang sempurna akan dikurniakan ganjaran yang hebat di sisi Illahi, begitu juga bagi mereka yang berusaha membacanya seperti hadis Rasulullah SAW:

أَلْمَاهِرُ بِالْقُرْآنِ مَعَ السَّفَرَةِ الْكِرَامِ الْبَرَّةِ وَالَّذِي يَقْرُوهُ وَيَتَعَتَّعُ فِيهِ وَهُوَ عَلَيْهِ شَاقٌّ لَهُ أَجْرَانِ

Bermaksud: Orang yang mahir membaca al-Quran ia bersama para malaikat yang mulia, orang yang membacanya dengan tersangkut-sangkut dan berasa susah membacanya (iaitu sewaktu mempelajari al-Quran) untuknya dua ganjaran. (Hadis Riwayat Bukhari)

Keempat: Jadikan membaca al-Quran budaya harian. Mulakan hidup setiap pagi dengan membaca walaupun hanya sepotong ayat al-Quran diikuti dengan maksudnya.

بَارَكَ اللَّهُ لِي وَلَكُمْ بِالْقُرْآنِ الْعَظِيمِ وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ. أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ وَلِسَائِرِ الْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.



Khutbah Kedua

الْحَمْدُ لِلَّهِ⁴ حَمْدًا كَثِيرًا طَيِّبًا مُبَارَكًا فِيهِ. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدَهُ وَرَسُولَهُ. اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ⁵ وَعَلَى آلِهِ وَأَصْحَابِهِ أَجْمَعِينَ. أَمَّا بَعْدُ، فَيَا عِبَادَ اللَّهِ! اتَّقُوا اللَّهَ⁶ وَكُونُوا مَعَ الصَّادِقِينَ.

Muslimin yang dirahmati Allah,

Mimbar menyeru para jemaah agar tetap berpegang kepada aqidah Islamiah berteraskan Ahli Sunnah Waljamaah, yang menjadi warisan Rasulullah SAW, sahabat dan tabiin serta yang mengikutinya dari kalangan Asyairah Maturidiah. Jagalah hubungan dengan Allah SWT dan sesama manusia. Makmurkan rumah-rumah Allah dengan istiqamah mengerjakan ibadah, terutama solat fardu berjemaah. Perbanyakkan selawat dan salam ke atas Junjungan Besar Nabi Muhammad SAW.

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا⁷

اللَّهُمَّ صَلِّ عَلَى مُحَمَّدٍ وَعَلَى آلِ مُحَمَّدٍ كَمَا صَلَّيْتَ عَلَى إِبْرَاهِيمَ وَعَلَى آلِ إِبْرَاهِيمَ وَبَارِكْ عَلَى مُحَمَّدٍ وَعَلَى آلِ مُحَمَّدٍ كَمَا بَارَكْتَ عَلَى إِبْرَاهِيمَ وَعَلَى آلِ إِبْرَاهِيمَ فِي الْعَالَمِينَ إِنَّكَ حَمِيدٌ مَجِيدٌ. اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ⁸، وَأَصْلِحْ ذَاتَ بَيْنِهِمْ وَأَلْفَ بَيْنَ قُلُوبِهِمْ وَاجْعَلْ فِي قُلُوبِهِمُ الْإِيمَانَ وَالْحِكْمَةَ، وَثَبِّتْهُمْ عَلَى مِلَّةِ رَسُولِ اللَّهِ ﷺ.

اللَّهُمَّ أَعِزِّ الْإِسْلَامَ وَالْمُسْلِمِينَ وَانصُرْ إِخْوَانَنَا وَأَخَوَاتِنَا وَأَطْفَالَنَا فِي فَلَسْطِينَ، وَاحْفَظْ أَهْلَهَا وَانصُرْ جُنُودَهَا وَدَمِّرْ أَعْدَاكَ أَعْدَاءَ الدِّينِ يَا رَبَّ الْعَالَمِينَ.

Ya Allah! Ya Rabbal 'alamin!, muliakan kami dengan takwa dan istiqamah. Bukakan pintu hati kami untuk terus istiqamah melaksanakan ibadah sepanjang hayat kami. Limpahkanlah rahmat dan keberkatan Mu ke atas kami dan keluarga kami dengan ketinggian dan kebesaran al-Quran al-Karim.

⁴ Memuji Allah

⁵ Selawat ke atas Nabi Muhammad SAW

⁶ Pesan Taqwa

⁷ Ayat Al-Quran

⁸ Doa untuk Kaum Muslimin



Ya Mannan! Ya Razzaq!, berkatilah hamba Mu yang melaksanakan zakat, wakaf dan sedekah. Kurniai mereka rezeki yang berlipat ganda, serta sucikanlah harta dan jiwa mereka; jauhi golongan *fuqara* dan *masakin* daripada kekufuran dan kefakiran yang berpanjangan.

Ya Dzal Jalaali wal Ikram!, jadikanlah kami antara hamba Mu yang memelihara amanah. Kuatkan iman kami agar menjauhi perbuatan khianat seperti salah guna harta benda bukan milik kami, memberi atau menerima rasuah, menyalahgunakan kuasa untuk kepentingan diri, serta jauhkan kami termasuk dalam golongan yang mengabaikan tanggungjawab yang diamanahkan.

Ya Maalikal Mulk!, jauhi negara kami daripada kehancuran disebabkan perbuatan rasuah; serahkan tanggungjawab pimpinan dan pengurusan negara kami kepada kalangan hamba Mu yang amanah dan ikhlas, serta tegas lagi berani menegakkan kebenaran dan melaksanakan keadilan berlandaskan hukum.

Ya Malik! Ya Hadi!, kurniakanlah taufik dan hidayah Mu terhadap raja kami, Duli Yang Maha Mulia Paduka Seri Sultan Perak Darul Ridzuan, Sultan Nazrin Muizzuddin Shah Ibni Almarhum Sultan Azlan Muhibbuddin Shah Al-Maghfur-Lah, dan Raja Permaisuri Perak Darul Ridzuan Tuanku Zara Salim serta kerabat diraja dan seluruh rakyat jelata.

رَبَّنَا إِنَّا فِي الدُّنْيَا حَسَنَةٌ وَفِي الآخِرَةِ حَسَنَةٌ وَقِنَا عَذَابَ النَّارِ

فِيَا عِبَادَ اللَّهِ، ﴿إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايَ ذِي الْقُرْبَىٰ وَيَنْهَىٰ عَنِ
الْفَحْشَاءِ وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ﴾ ﴿فَاذْكُرُوا اللَّهَ الْعَظِيمَ يَذْكُرْكُمْ،
وَاشْكُرُواهُ عَلَىٰ نِعْمِهِ يَزِدْكُمْ، وَاسْأَلُوهُ مِنْ فَضْلِهِ يُعْطِكُمْ، وَلِذِكْرِ اللَّهِ أَكْبَرُ، وَاللَّهُ يَعْلَمُ
مَا تَصْنَعُونَ.﴾